

**MESYUARAT PERTAMA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
17 APRIL 2020**

PERKARA : 5(B)(XVII)9

**SOALAN BERTULIS OLEH AHLI KAWASAN PERMATANG
BERANGAN**

YB. NOR HAFIZAH BINTI OTHMAN

9. Bantuan Kepada Golongan Miskin Tegar :
- (a) Apakah rancangan Kerajaan Negeri Pulau Pinang dalam usaha mengurangkan statistik miskin tegar dan miskin dalam negeri ini sebagai peluang untuk mengubah nasib mereka?
 - (b) Selain Jabatan Kebajikan Masyarakat, senaraikan agensi/jabatan yang terlibat yang boleh dirujuk oleh ADUN-ADUN untuk membantu menangani masalah ini.

YB. PHEE BOON POH

MENJAWAB BAGI PIHAK Y.A.B. KETUA MENTERI

9. (a) Selaras dengan visi Penang2030 di bawah inisiatif strategik *Uplift vulnerable communities and reduce inequalities*, Kerajaan Negeri terus memberi perhatian yang serius kepada nasib penduduk miskin di Pulau Pinang. Susulan kejayaan Kerajaan Negeri dalam membasmi miskin tegar, Kerajaan Negeri terus merancang dan melaksanakan inisiatif untuk membantu golongan miskin. Inisiatif-inisiatif tersebut adalah seperti berikut:-
- (i) Meneruskan pelaksanaan bantuan Program Agenda Ekonomi Saksama (AES) untuk membantu dan membasmi kemiskinan negeri. Program bantuan ini menambah pendapatan penerima bantuan AES agar pendapatan bulanan mereka melebihi Pendapatan Garis Kemiskinan, sekali gus mengeluarkan penerima bantuan daripada status miskin;
 - (ii) Melaksanakan Program “2 Years Exit Programme” kepada penerima-penerima bantuan Jabatan Kebajikan Masyarakat (JKM) yang layak. Program yang

berkonsepkan kebajikan produktif ini menyediakan penerima bantuan yang terlibat dengan program ini untuk lebih berdikari dan tidak terus bergantung kepada bantuan kerajaan semata-mata untuk sara hidup selain mewujudkan peluang penjanaaan sumber pendapatan yang stabil dan berterusan kepada peserta program;

- (iii) Menyalurkan bantuan kewangan bulanan di bawah Bantuan Am Negeri. Bantuan-bantuan di bawah seliaan JKM ini merangkumi Bantuan Am dan Bantuan Pemulihan, Bantuan Sekolah Kepada Pelajar Miskin, Bantuan Bencana Alam, Tabung Bantuan Segera Negeri, dan Bantuan Banjir Kilat Peruntukan Negeri;
- (iv) Bantuan Bina Baru merupakan antara bantuan yang diberikan kepada golongan miskin untuk menampung perbelanjaan membina rumah kediaman yang lebih sesuai untuk didiami. Bantuan Baik Pulih Rumah pula diberikan untuk menampung kos-kos membaik pulih rumah kediaman yang rosak agar bebanan implikasi kewangan tersebut dapat dikurangkan;
- (v) Mengadakan kursus-kursus kemahiran di bawah Program Pembangunan Modal Insan. Di bawah program ini, golongan-golongan miskin digalakkan menyertai kursus-kursus kemahiran yang melatih mereka kepada pembangunan kemahiran-kemahiran tertentu untuk digunakan sebagai asas penjanaaan pendapatan untuk hidup berdikari tanpa perlu bergantung harap kepada bantuan-bantuan kerajaan;
- (vi) Melaksanakan Program Peningkatan dan Pemulihan Ekonomi di bawah Projek Khas Ekonomi. Program ini memfokuskan kepada peniaga kecil sepenuh masa termasuk golongan miskin. Mereka yang telah menjalankan perniagaan sekurang-kurangnya 1 tahun dan berpendapatan kurang daripada RM3,000 sebulan adalah layak untuk mendapat bantuan peralatan dalam usaha mengembangkan lagi perniagaan sedia ada;
- (vii) Menyediakan perkhidmatan Skim Pinjaman Harapan (SPH) kepada bakal-bakal usahawan. SPH di bawah seliaan Perbadanan Pembangunan Pulau Pinang (PDC) menyediakan saluran modal tambahan yang mudah dan

tidak membebankan peminjam dengan kelayakan yang menyukarkan proses pinjaman. Program mikro kredit memberi peluang kepada usahawan tempatan, penganggur dan golongan B40 untuk menceburi bidang keusahawanan dengan membuat pinjaman wang tanpa sebarang cagaran dan penjamin. Golongan-golongan miskin dapat menggunakan pinjaman yang disediakan ini untuk mengubah nasib hidup mereka;

- (viii) Menyediakan kemudahan kredit Tabung Usahawan Tani (TUT) Negeri Pulau Pinang. Tabung pinjaman mikro kredit tanpa riba ini diwujudkan bagi memberi dorongan kepada penternak, petani, dan nelayan, khususnya dalam golongan B40, untuk menjadikan sektor industri asas tani sebagai kerjaya dan punca pendapatan yang besar. Dahulunya dikenali sebagai Tabung Usahawan Tani Muda (TUTM) dan memfokuskan kepada belia, kini had umur tabung tersebut telah diperluas kepada peminjam berumur 18 hingga 60 tahun;
- (ix) Menyediakan program-program bantuan di bawah seliaan Zakat Pulau Pinang (ZPP) yang disasarkan kepada golongan fakir dan miskin seperti Bantuan Dermasiswa Institusi Pengajian Tinggi (IPT), Bantuan Kewangan Bulanan, Skim Bantuan al-Ghorimin (bagi orang yang berhutang) dan Skim Modal Perniagaan dan Peralatan; dan
- (x) Menaja pelajar-pelajar cemerlang dalam kalangan asnaf melalui kerjasama antara ZPP dan MyPAC untuk mengikuti kursus *Association of Chartered Certified Accountants* (ACCA). Juga berkerjasama dengan pusat-pusat kemahiran bagi melatih anak-anak asnaf dalam bidang tumpuan seperti NAZA Academy (bidang automotif), *Penang Skills Development Centre* (bidang permesinan), K-Techno (bidang robotik), dan Akademi Binaan Malaysia (bidang jentera berat).

Untuk meringankan beban kewangan ke atas rakyat yang terkesan akibat pelaksanaan Perintah Kawalan Pergerakan (PKP) termasuk golongan miskin, Kerajaan Negeri telah mengumumkan bantuan-bantuan seperti berikut:-

- (i) Bantuan *one-off* RM500 kepada peniaga dan penjaja berlesen merangkumi peniaga pasar malam, pasar tani, dan pengusaha kendara saji;
- (ii) Bantuan *one-off* RM500 kepada penerima bantuan Jabatan Kebajikan Masyarakat (JKM) dan penerima Program Agenda Ekonomi Saksama;
- (iii) Bayaran RM500 kepada penarik beca merangkumi bantuan *one-off* RM200 dan baki insentif tahunan RM300 yang diawalkan pembayarannya;
- (iv) Pengecualian sewa selama dua bulan bagi penghuni Program Perumahan Rakyat (PPR);
- (v) Pengecualian bayaran sewa selama sebulan bagi premis-premis perniagaan milik Pihak Berkuasa Tempatan (PBT);
- (vi) Penangguhan tempoh bayaran balik selama tiga bulan bagi peminjam Skim Pinjaman Harapan, Tabung Usahawan Tani, dan Pinjaman Penuntut; dan
- (vii) Bantuan zakat kepada golongan asnaf.

Selain itu, Kerajaan Negeri juga telah meluluskan pek bantuan makanan kering kepada golongan terkesan akibat pelaksanaan PKP. Sebanyak 20,000 pek bantuan dengan kos keseluruhan RM1 juta akan diedarkan kepada penerima manfaat yang terdiri daripada penerima bantuan JKM, penerima bantuan AES, penduduk Projek Perumahan Rakyat (PPR) atau rumah kos rendah, dan mana-mana individu/keluarga yang dikenal pasti layak untuk menerima bantuan.

- (b) Selain JKM, Yang Berhormat ADUN-ADUN boleh merujuk jabatan/agensi tersebut untuk menangani masalah golongan miskin:-
 - i. Pusat Zakat Pulau Pinang;
 - ii. Pejabat Daerah dan Tanah;

- iii. Perbadanan Pembangunan Pulau Pinang; dan
- iv. Mutiara Foodbank.